

SKUVLEN- JA OAHPPAMATERIÁLADOAIMMAHAT □
KOULUTUS- JA OPPIMATERIAALITOIMISTO
Anni Näkkäljärvi & Rauna Rahko

ČEAHPES SÁMENUORAT ČOAHKKANEDJE OHCEJOHKII

Sáminuoraid dáiddadáhpáhusii Ohcejotnjálmmi skuvlagoovddážiis oassálaste lagabui 300 oahppi sámeaguovllu 16 skuvllas, main oahpahit sámegeillii dahje sámegeiela. Jahkásaš dáhpáhusa ulbmilin lea oasistis doarjut ja nannet sámi mánáid ja nuoraid sámegeiela geavaheami ja sámi iešdovddu. Nuppe dáfus dáiddadáhpáhusa bokte nuorat besset ovdánbuktit dáidduideaset.

Ohcejoga skuvlagoovddážiid ledje čeahkkánan sullii 450 earenoamáš čáppát čihahuvvon olbmo. Gákti ii lean vajálduvvan bivttassáhppii: nuoraid gárvodeapmi čájehii sihke hálu ja roahkkatvuoda buktit ovdán sámevuoda. Rektor **Arja Alaraudanjoki** sáváige buriin mielain buohkaid buresbohtán dáiddadáhpáhusii ja dan maŋŋá oahpaheaddji **Helmi Länsman** beasaige gohččut lávddi ala sámeaguovllu čeahpes nuorra artisttaid.

Dáhpáhusa šládjan dán jagi ledje musihkka ja ráidogovva. Musihkkaosáisi ledje almmuhan oktiibuot 20 joavkku, ja ráidogavat bohte 180. Musihkkaduopmárat **Anukka Hirvasvuopio-Laiti**, **Tiina Sanila** ja **Mikkal** “Amoc” **Morottaja** deattuhedje árvvošdallamis erenoamážit dan, man ollu nuorat ieža ledje plánen iežaset čájáhusaid ja mo sii ieža ovdanbukte daid lávddi alde. Duopmárat giddejedje fuopmášumi maiddái dasa, man bures nuorat máhtte sániid bajil. Oppalohkáid duopmárat gávnnehedje váigadin loktet ovttaga čájáhusa buorimussan, dasgo sin mielas juohke joavku livččii ánsašán bálkášumi.

Musihkkagilvvu álggahedje Gáregasnjárgga skuvlla 0-3 luohkáid **Badjemánát** bihtáinis *Eallu lea dál gárddis*, bagadeaddjin lei Kaaren Kitti. Anársámegeielat mánáidlávлага *Täälvist kal lii juonâs (Juhcá, jullá)* ovdanbukte Anára vuoddoskuvlla oahppit **Purgáčiivgah**, bagadeaddjin Miina Seurujärvi, Armi Seurujärvi ja Heli Aikio. Čuovvovažžan ledje Avvila 0-6 luohkáid oktasaš joavku **Gufihttarmánát** bihtáinis *Skuvlabeaiveblues*, bagadeaddjin Bigga-Helena Magga ja Soile Ratavaara-Peltonen. Anára vuoddoskuvlla 2. ja 3. luohkálaččat **Xia & Irina** lávlluiga Tiina Sanila bihtá *Ráhkistatgo don mu?* Soai leigga hárbjehallan Ritva Torikka vehkiin. Vuohču stuorra, 14 oahppi joavku **Vuohču ráidu**” ovdanbuvttii iežaset bihtá *Ratio*, man lei bagadan Tuula-Maija Magga-Hetta. Sii gilvvohalle 4-6 luohkálaččaid luohkás. Čeavetjávrru skuvllas 2. luohká oahppit **Juuso Fofonoff ja Hannele Fofonoff** lávlluiga Naska Mosnikoff lávлага *Tutbaja*, mii lea mánáid nohkađanlávlla. Oahpaheaddji Seija Sivertsen lei bagadan sutno. *Jussá, Piákká ja neidah* ovdanbukte anársámegeillii Aune Vesa bihtá *Sáará-Márjá* luohkás 4-6, bagadeaddjin Heli Aikio. Čeavetjávrru skuvllas ledje bohtán maiddái 5-6 luohkáid **Tantsaajat**, geat ovdanbukte Katri Jefremoff heivehan árbevirolaš bihtá *Ainamilaadu – rumbučájáhus*. Sin lei bagadan Seija Sivertsen. Gáregasnjárgga 6-7 luohkáid oahppit, **Duottarnuorat**, juige árbevirolaš luodí *Gáregasnjárga*, masa sániid lei duddjon Káre Risten. Joavkku lei bagadan Kaaren Kitti. Ovdal bottu lávddi nala bohte vel Gárasavvona skuvlla 6-12 jahkásaš oahppit, **Buoidagat**, čájáhusainis *Čáppa jurdagiiuin geasseorohagaide*, man ledje bagadan oahpaheaddjit Anna-Reetta Niemelä, Taina Syväjärvi ja Timo Kurki.

Bottu áigge Ohcejotnjálmmi 9. luohká oahppit dolle bufeahtha ja vuvde gussiide njálgáid, gáfiid ja smávva borramušaid. Seammas besse olbmot ságastallat ja oahpásnuvvat nubbi nubbái, mii leage dáiddadáhpáhusa okta deahálaš ulbmil. Gussiid siste leigga maiddái kulturplánejeaddji **Panu Mäenpää** ja doaibmagotti lahttu **Jorma Pilke** Helssegis Allianssi –nuoraid searvvis, mii lágida riikkaviidosas Nuorra Kultuvra dáhpáhusa dán jagi.

Bottu maŋŋá Ohcejotnjálmme skuvlla **Mánáid mánát** besse čájehit dáidduideaset 4-6 luokás bihtáinis **Áhkku káhkku**, man sii ieža ledje ráhkádan ovtta bihtá bagadeaddjin Niilo Rasmusiin. Sin maŋŋá lei vuorus Anára **Ruovdeláigi – fierbmeáidi** –nammasaš joavku Áillohaččá bihtáin *Váimmustan lea bieggá*, bagadeaddjin Inker-Anne Magga ja Heli Aikio. Katri Kittilä lei bagadan **Beaivvi nuoraid** Avvila vuoddoskuvlla bajit luokkain ja logahagas. Sii ovdanbukte Mari Boine bihtá *Beaivvinieida* ja Niko Valkeapää bihtá *Stirdon*. **Aanaar tuškâ** joavku čuojahii guokte rockbihtá, maid ee. joavkku bagadeaddji Heli Aikio lei eangalasielas jorgalan anársamegillii: *Vuástás* (Six Ribbons: Jon English) ja *Ohtâ mist* (One of us: Eric Bazilian). Anáris lei eret maidái **Uđas** –joavku, mii čuojahii guokte Tiina Sanila bihtá *Ráhkistatgon mu* ja *Ovllá*. Sin leigga bagadan Pentti Pennanan ja Seija Magga. Vuohču joavku **SomBy** čuojahii guokte “Sápmi rocks” –bihtá. Sin maŋŋá lei vuorus **Soadegili sámegiela oahppit** bihtáin Mari Boine *Oktavuohta*. Eanodaga skuvlla ja logahaga oahppit **Nástemánážat** ledje ráhkádan koreagrafiijá dánsui, man ledje gohčodan *The move*. Maŋimužžan lávddi ala bohte Ohcejotnjálmme čeahpes nuorat, **Áiggi mánát**, bihtáinis *1000 jagi*, man ledje ráhkádan ovtta oahpaheadji Niilo Rasmusiin.

Dan bottá go musihkkaduopmárat barge ja guorahalle, gean sii háliidit sáddet Turkui ovddastit sáminuoraid, de juhkkajuovjedje ráidogovvagiilvvu bálkášumit. Ráidogovaid lei árvvoštallan **Linda Sjöholm** Roavvenjárggas. Son lea válmmaštuvvamin govvadáiddaoahpaheadjin ja su gradubargunái giedahallá ráidogova. Sus lei veahkkín **Rauna Rahko**. Árvvoštallamis giddejuvvui fuomášumi dáiddalaš iešvuhtii, sámi symbolaid ja kultuvrra dovdamii, ráidogova vugiid ja giela atmosfärii sihke dasa, leigo govvaráidu čielggas ja áddehahtii. Dáŋge šlája árvvoštallamis duopmáriidda lei váigat välljet buoremusaid 180 buorre ráidogova joavkkus.

Musihkkagilvvu bohtosat

Musihkkašládjan ledje konseartamusihkka, álbmotmusihkka, rap, reggae, dancemusic, geahppa musihkka, jazzmusihkka sihke rock- ja popmusihkka. Turkui Nuorra Kultuvra dáhpáhussii välljejuovjedje 3 joavkku: anárašgielat joavku **Jussá, Piákká ja nieidah** (4-6 lhk), **Uđas** –joavku maid Anáris bihtáin *Ovllá* ja vel Vuohču joavku **SomBy** Mari Boine bihtáin *Alla hearrát guhkin Oslos*.

0 – 3 lk:

1. **Purgâčiivgah , Anára vuolledássi**; “Täälvist kal lii juonâs/Juhcá jullá”
2. **Kolmoset, Čeavetjávrrri skuvla**; “Tutbaja” –leu´dd
3. **Xia & Irina, Anára vuolledássi**; ” Ráhkistat go mu?

4-6 lk:

1. **Jussá, Piákká ja nieidah, Anára vuolledássi**; “Sáará-Márjá”
2. **Tanttsaajat, Čeavetjávrrre skuvla**; “Ainamilaadu” – rumbučájáhus
3. **Buoidagat, Gárasávva skuvla**; ”Čáppa jurdagiiguin geasseorohagaide”

7-9 ja logahat

1. **SomBy, Vuohču skuvla**; “Sápmi rocks”
2. **Uđas, Anára skuvla**; “Ráhkistatgo mu” ja “Ovllá”
3. **Aanaar tuškâ, Anára skuvla**; “Vuástás” já “Ohtâ mist”

Gutnebálkkašupmi: Nástemánážat: The move, Eanodága vuoddoskuvla ja logahat

Ráidogovvagiilvvu bohtosat

Ráidogova temán lei **DAVVIN – TAVVEEN – TÁVVEN** ; máinnas dahje muitalus eallimis davvin – dáhpáhusain, beaivválaš bargguin; historjjá, dábiid, márkaniid, biktasiid ja sogaid birra... Materiálan geavahuvvui 4A-bábir, ovtta árkkas galge leat unnimusta 4 ja eanemustá 6 ruvtto. Govaid galggai sárgut čáhpes tuššain dahje peannain, ivnniid ja dušše liántta geavaheapmi lei gildojuvvon.

0-3 luohkká

1. **Mari Orvokki Muhonen**, Anára skuvla 1lk.
2. **Jolanda Magga**, Avvila vuolledássi 3 lk.
3. **Sanna – Máret Muhonen**; Anára skuvla 3 lk.

4-6- luohkká

1. **Jussá Seurujärvi**, Anára skuvla 4 lk.
2. **Kim Rasmus**, Ohcejotnjálmmi skuvla, 6.lk.
3. **Leena Fofonoff da Almira Gerasimoff**, Čeavetjávri 5 ja 6. lk. (ovttas)

7-9 luohkká

1. **Sunna Kitti**, Anára skuvla 9 lk.
2. **Mari- Kristiina Guttorm**, Anára badjedássi 7 lk.
3. **Pauliina Länsman**, Ohcejotnjálmmi skuvla 7. lk.

Logahat:

1. **Henry Tapani Valle**, L2. Ohcejoga sámelogahat
2. **Maiju Alaraudanjoki**, L1. Ohcejoga sámelogahat
3. **Inga Koivisto**, L1. Ohcejoga sámelogahat.



Aarnaar tuška; govven Anni Näkkäläjärvi